

**Bosna i Hercegovina  
Federacija Bosne i Hercegovine  
Unsko-sanski kanton  
OPĆINA CAZIN  
OPĆINSKI NAČELNIK**



**Bosnia & Herzegovina  
Federation of Bosnia & Herzegovina  
Una-sana Canton  
CAZIN MUNICIPALITY  
MAYOR OF MUNICIPALITY**

**U R E D B A  
O ORGANIZIRANJU I OSNIVANJU SLUŽBI ZAŠTITE I SPAŠAVANJA  
OPĆINE C A Z I N**

**februar 2008**

Na osnovu člana 123. stav 3. Zakona o zaštiti i spašavanju ljudi i materijalnih dobara od prirodnih i drugih nesreća («Sl. novine Federacije BiH», br. 39/03 i 22/06), člana 13. Uredbe o organizovanju službi zaštite i spašavanja Federacije BiH («Sl. novine Federacije BiH» br. 77/06), člana 6. Pravilnika o organiziranju službi zaštite i spašavanja i jedinica civilne zaštite, njihovim poslovima i načinu rada («Sl. novine Federacije BiH», br. 77/06), te člana 27 i 28 Odluke o organiziranju i funkcionisanju zaštite i spašavanja ljudi i materijalnih dobara od prirodnih i drugih nesreća za područje općine Cazin br. 01/V-05-3428/04 od 05.06.2004. godine Općinski načelnik općine Cazin, na prijedlog Službe za civilnu i protivpožarnu zaštitu, **d o n o s i**

## **U R E D B U**

### **O ORGANIZIRANJU I OSNIVANJU SLUŽBI ZAŠTITE I SPAŠAVANJA OPĆINE C A Z I N**

#### **I – OSNOVNE ODREDBE**

##### **Član 1. (predmet uredbe)**

Ovom Uredbom određuju se pravna lica odnosno udruženja građana u kojima se organiziraju službe zaštite i spašavanja, određuju vrste službi koje se formiraju, utvrđuju zadaci službe, određuje način popune službe ljudstvom i materijalno-tehničkim sredstvima i određuje općinski organ civilne zaštite, koji će zaključiti ugovor sa pravnom licem, odnosno udruženjem građana o međusobnim pravima i obavezama u vršenju poslova zaštite i spašavanja koja će djelovati na području općine.

##### **Član 2. (osnov za organiziranje službi)**

U cilju stvaranja uslova da se u svim slučajevima nastanka prirodne ili druge nesreće na bilo kom dijelu područja Općine može osigurati odgovarajuća zaštita i spašavanje ljudi i materijalnih dobara formiraju se službe zaštite i spašavanja na nivou Općine.

U skladu s ciljevima iz stava 1. ovog člana osnovno polazište za organiziranje službi zaštite i spašavanja je Procjena ugroženosti za područje Općine Cazin od prirodnih, tehničko-tehnoloških i ostalih nesreća, koja je usvojena Odlukom Općinskog načelnika broj: 01/N-05-2719/05 od 11. 04. 2005. godine.

##### **Član 3. (uslovi za organiziranje službi)**

Službe zaštite i spašavanja iz ove Uredbe organizuju se u privrednim društvima i drugim pravnim licima iz člana 32. Zakona o zaštiti i spašavanju ljudi i materijalnih dobara od prirodnih i drugih nesreća, koja ispunjavaju slijedeće uslove:

- 1) da je njihova djelatnost ili dio djelatnosti takve vrste koja je od značaja za zaštitu i spašavanje ljudi i materijalnih dobara od prirodnih i drugih nesreća,
- 2) da raspolažu kadrovima koji su stručno obučeni i osposobljeni za vršenje poslova iz nadležnosti službe zaštite i spašavanja koja će se formirati,
- 3) da su materijalno opremljeni odgovarajućom opremom i drugim materijalno tehničkim sredstvima koja su naophodna za vršenje poslova iz nadležnosti službe zaštite i spašavanja.

**Član 4.**  
**(upotreba službi)**

Službe zaštite i spašavanja, predviđene ovom Uredbom, namijenjene su da djeluju na području Općine u svim slučajevima kada treba brzo i efikasno izvršiti sve zadatke na zaštiti i spašavanju ugroženih ljudi i materijalnih dobara, povodom nastanka prirodne i druge nesreće u odnosu na poslove za koje su nadležne te službe, a u skladu sa naredbama Općinskog štaba civilne zaštite (u daljem tekstu: Općinski štab).

**Član 5.**  
**(osnovni poslovi)**

Službe zaštite i spašavanja vrše prije svega, operativne mjere zaštite i spašavanja, osnovni poslovi službi detaljno se uređuju u odluci ili pravilniku koju će donijeti pravno lice i formirati predviđenu službu, a detaljna nadležnost svake služba zaštite i spašavanja uređuje se u ugovoru o međusobnim pravima i obavezama, kojeg zaključuje pravno lice i nadležni organ civilne zaštite.

**II - PRAVNA LICA U KOJIMA SE ORGANIZIRAJU SLUŽBE ZAŠTITE I  
SPAŠAVANJA, VRSTE SLUŽBI I NJIHOVI ZADACI**

**Član 6.**  
**(broj i vrsta službi)**

Polazeći od kriterija iz člana 3. ove Uredbe, a u skladu sa Procjenom ugroženosti na području općine Cazin, službe zaštite i spašavanja osnivaju se u slijedećim pravnim licima i udruženjima i to:

- 1) Služba za medicinsku pomoć u Zdravstvenoj ustanovi "Dom zdravlja", Cazin,
- 2) Služba za snabdijevanje stanovništva pitkom vodom u J.K.P. "Vodovod", Cazin,
- 3) Služba za čistoću i higijenu u J.K.P. "Čistoća", Cazin,
- 4) Veterinarska služba u J.P. "Veterinarska stanica", Cazin,
- 5) Služba za zaštitu od požara u sklopu "Dobrovoljnog vatrogasnog društva Pećigrad",
- 6) Služba za zbrinjavanje ugroženog i stradalog stanovništva u sklopu Općinske organizacije Crvenog križa, Cazin.

**Član 7.**  
**(služba za medicinsku pomoć)**

Služba za medicinsku pomoć obavlja operativne mjere zaštite i spašavanja koje se odnose na zdravstveno zbrinjavanje povrijeđenih i oboljelih ljudi na pogođenom području: obavlja medicinsku trijažu za određivanje težine povreda ili oboljenja i utvrđuje red hitnosti za pružanje prve medicinske pomoći; vrši sanitetsku evakuaciju, pronalaženje, izvlačenje i iznošenje povrijeđenih i oboljelih lica, te njihov transport do zdravstvene ustanove radi zdravstvenog zbrinjavanja; pruža općemedicinsku pomoć koja se odnosi na provjeru i dopunu postupka prve pomoći, prema ukazanoj potrebi ove poslove vrši neposredno na terenu kao pokretna bolnica (poljska bolnica); vrši dezinfekciju, dezinfekciju i deratizaciju na pogođenom području; poduzima mjere na angažiranju stručnih timova zdravstvene zaštite u fazi otklanjanja posljedica; vrši neprekidnu kontrolu zdravstvenog stanja ljudi na ugroženom području radi sprečavanja pojave zaraznih bolesti; vrši identifikaciju poginulih i umrlih ljudi i druge poslove i zadatke iz svoje nadležnosti.

## Član 8.

### **(služba za snabdijevanje stanovništva pitkom vodom)**

Služba za snabdijevanje stanovništva pitkom vodom vrši operativna mjere zaštite i spašavanja koje se odnose na snabdijevanje stanovništva pitkom vodom na pogođenom području; vrši popravku postojećih, oštećenih i uništenih objekata vodosnabdijevanja i vodovodne mreže; postavlja pumpe za vodu i druge uređaje za eksploataciju podzemnih voda; snabdijevanje stanovništva vodom putem cisterni ili na drugi način; vrši stalnu kontrolu ispravnosti postojećih izvora kao i podzemnih voda koje se koriste za piće; planira redukcije i način korištenja vode za piće u domaćinstvima; angažira stručne timove iz oblasti vodosnabdijevanja; osigurava uvjete za normalno snabdijevanje stanovništva higijenski ispravnom vodom na pogođenom području i obavještava stanovništvo o načinu odlaganja i selekcije otpada; obavještava stanovništvo o svim drugim pitanjima važnim za redovno održavanje kanalizacije i čistoće okoline i druge poslove iz svoje nadležnosti.

## Član 9.

### **(služba za čistoću i higijenu)**

Služba za higijenu i čistoću vrši operativne mjere zaštite i spašavanja koje se odnose na održavanje čistoće i higijene, te mjere asanacije terena na pogođenom području; vrši skupljanje i odvoz smeća; vrši čišćenje javnih površina od otpada i šuta koji je nastao rušenjem ili oštećenjem objekata od djelovanja prirodne ili druge nesreće; uređuje odlagalište smeća i održava takve prostore; obavještava stanovništvo o načinu odlaganja i selekcije otpada; ; vrši angažiranje komunalnih službi na provođenju higijensko-epidemioloških mjera zaštite i spašavanja; vrši poslove koji spadaju u asanaciju terena, a odnose se na sahranjivanje poginulih i umrlih ljudi i spaljivanje ili zakopavanje uginulih životinja; obavještava građane o režimu i mjestu sahranjivanja ljudi; vrši angažiranje pogrebnih službi na vršenju zadataka koji se odnose na sprečavanje zaraze, epidemije i drugih štetnih posljedica po ljude na pogođenom području.

## Član 10.

### **(veterinarska služba)**

Veterinarska služba vrši operativne mjere zaštite i spašavanja koje se odnose na zaštitu i spašavanje povrijeđenih i oboljelih životinja: pruža prvu pomoć povrijeđenim i oboljelim životinjama, obavlja poslove u cilju sprečavanja širenja i suzbijanja zaraznih, parazitskih, uzgojnih i drugih masovnih bolesti životinja; vrši liječenje životinja; provodi hirurške, porodiljske i druge intervencije na životinjama; vrši klanje i kontroliše korištenje teže povrijeđenih životinja, sirovina i proizvoda životinjskog porijekla; prati, istražuje, unapređuje i primjenjuje metode otkrivanja, suzbijanja i prevencije zaraznih parazitnih i drugih oboljenja životinja; vrši angažiranje stručnih timova veterinarske struke na otklanjanju posljedica; vrši izmještanje životinja na sigurnija područja; vrši zbrinjavanje povrijeđenih i uginulih životinja, planira i predlaže mjere dezinfekcije, dezinsekcije i deratizacije; vrši neprekidnu kontrolu zdravstvenog stanja životinja na pogođenom području zbog mogućnosti pojave zaraznih bolesti.

## Član 11.

### **(služba za zaštitu od požara)**

Služba za zaštitu od požara vrši operativne mjere zaštite i spašavanja koje se odnose na zaštitu šuma, usjeva, stambenih i drugih zgrada i objekata i druge imovine od požara na pogođenom području na način da po naredbi o upotrebi službe u gašenju požara organizira podizanje sastava službe; procjenjuje pravac kretanja požara i određuje snage i sredstva potrebna za gašenje požara, određuje najpogodnije pravce kretanja protupožarnih ekipa do požarišta; vrši izmještanje mašina i uređaja, tovarnih životinja koje se nalaze na ugroženom

području; gasi požar prema sopstvenim mogućnostima, surađuje sa drugim snagama u toku gašenja požara; sudjeluje u nadzoru i organizaciju gašenja požara svih snaga angažiranih na gašenju požara; spašava ljude iz zadimljenih i zapaljenih prostorija, evakuira iz objekata koji se nalaze ispred fronta požara; sprečava prenošenje vatre na okolne objekte; utvrđuje obim nastalih šteta na pogođenom području u suradnji sa komisijama za procjenu šteta; osigurava prostor na kojem je ugašen požar od ponovnog razbuktavanja.

Član 12.  
**(služba za zbrinjavanje ugroženog i stradalog stanovništva)**

Služba za zbrinjavanje ugroženog i stradalog stanovništva vrši operativne mjere zaštite i spašavanja ljudi i materijalnih dobara, posebno u fazi spašavanja i otklanjanja posljedica ratnih događanja, prirodnih nesreća (požara, snježnih nanosa, lavina, poledica, klizišta i dr.), tehničko-tehnoloških nesreća, saobraćajnih i drugih nesreća većih razmjera. Ova služba vrši poslove prihvata, smještaja, te obezbjeđuje ishranu stradalom i ugroženom stanovništvu.

Član 13.  
**(sporazum o pravima i obavezama)**

Pored pomenutih pravnih lica Služba civilne i protivpožarne zaštite može odrediti i druga pravna lica, udruženja građana i nevladine organizacije čija je djelatnost od značaja za zaštitu i spašavanje i s tim pravnim licima, udruženjima i organizacijama može zaključiti sporazum o načinu i uslovima njihovog angažiranja na zadacima zaštite i spašavanja na području Općine, koje time imaju status službe zaštite i spašavanja.

U sporazumu iz stava 1. ovog člana utvrđuju se prava i obaveze o međusobnim odnosima u angažiranju tih pravnih lica, udruženja i nevladinih organizacija na zadacima zaštite i spašavanja kao i obaveze Službe za civilnu i protivpožarnu zaštitu prema tim pravnim licima, udruženjima i organizacijama koje se odnose na osiguranje određenih finansijskih sredstava za nabavku opreme i drugih sredstava rada koja su potrebna za rad tih udruženja i organizacija na zadacima zaštite i spašavanja.

**III – ZADACI NA FORMIRANJU, OPREMANJU, POPUNI I UPOTREBI SLUŽBI  
ZAŠTITE I SPAŠAVANJA**

Član 14.  
**(dužnost formiranja službi)**

Rukovodioci pravnih lica iz člana 6. ove Uredbe, u kojima se formiraju predviđene službe zaštite i spašavanja, u suradnji sa općinskom Službom za civilnu i protivpožarnu zaštitu vrše slijedeće poslove:

- 1) Odlukom formiraju službu, određuju rukovodioca službe i broj pripadnika službe,
- 2) Popunu službe vrše zaposlenicima koji se nalaze na radu u pravnom licu koji su obučeni i osposobljeni za vršenje poslova iz nadležnosti službe (utvrđuju ličnu formaciju službe),
- 3) Utvrđuju potrebe u opremi, tehničkim i drugim sredstvima rada koja su neophodna za rad službe zaštite i spašavanja i poduzimaju mjere za pribavljanje te opreme i sredstava, (utvrđuju materijalnu formaciju službe),
- 4) Organiziraju i provode obučavanje pripadnika službe za uspješno vršenje poslova zaštite i spašavanja u skladu sa nastavnim planovima i programima koje donosi Federalna uprava civilne zaštite-FUCZ,

- 5) U roku od šest mjeseci od potpisivanja ugovora iz člana 18. ove Uredbe, u obavezi su da izrade vlastite procedure rada za postupke djelovanja u slučajevima angažiranja na zadacima zaštite i spašavanja iz nadležnosti službe.

**Član 15.  
(angažiranje službi)**

Službe zaštite i spašavanja iz člana 6. do 12. ove Uredbe poslove iz svoje nadležnosti vrše u fazi nastanka prirodne ili druge nesreće i u fazi otklanjanja i saniranja nastalih posljedica, a zadatke koji se odnose na preventivnu zaštitu ostvaruju u okviru obavljanja redovne djelatnosti u pravnom licu u kojem su formirane, odnosno provode pravna lica i udruženja koja se bave zaštitom od požara.

Izuzetno Štab civilne zaštite nakon procjene vrste i obima opasnosti koje mogu dovesti do prirodne i druge nesreće može i preventivno angažirati postojeće službe zaštite i spašavanja.

**Član 16.  
(finansiranje)**

U cilju stvaranja uslova da službe zaštite i spašavanja iz člana 6. do 12. ove Uredbe mogu vršiti poslove zaštite i spašavanja predviđene ovom Uredbom, Služba za civilnu i protivpožarnu zaštitu planirat će odgovarajuća sredstva u budžetu Općine, kao i dio sredstava iz posebne naknade za zaštitu i spašavanje koja pripadaju Općini prema članu 180. Zakona o zaštiti i spašavanju ljudi i materijalnih dobara od prirodnih i drugih nesreća, koja će se koristiti za nabavku opreme, tehničkih i drugih sredstava koja su neophodna za rad tih službi i za obučavanje i osposobljavanje njihovih članova koji obavljaju poslove Službe zaštite i spašavanja.

Financijska sredstva iz stava 1. ovog člana osiguravaju se samo za finansiranje onog dijela aktivnosti službi zaštite i spašavanja koje će one vršiti kao dio dodatne djelatnosti koja se odnosi na zaštitu i spašavanje ljudi i materijalnih dobara od prirodnih i drugih nesreća.

Raspodjelu sredstava iz stava 1. ovog člana na pojedine službe zaštite i spašavanja, s podacima o vrsti i količini sredstava koja treba nabaviti vrši Služba za civilnu i protivpožarnu zaštitu, uz prethodno pribavljeno mišljenje Općinskog štaba civilne zaštite, a na zahtjev pravnih lica iz člana 6. ove Uredbe i u skladu s Programom razvoja, Godišnjim finansijskim planom i Godišnjim programom rada tih službi.

**Član 17.  
(materijalno tehnička sredstva)**

Pravna lica iz člana 6. ove Uredbe u kojima su formirane Službe zaštite i spašavanja, opremu i tehnička sredstva nabavljena iz sredstava člana 16. ove Uredbe mogu koristiti za obavljanje redovne djelatnosti, s tim da su dužni osigurati efikasno funkcionisanje službi zaštite i spašavanja kada se naredi njihovo angažovanje, što se bliže uređuje ugovorom iz člana 18. ove Uredbe.

## Član 18. (ugovor)

Služba civilne i protivpožarne zaštite, zastupana po Općinskom načelniku, će s pravnim licima iz člana 6. ove Uredbe zaključiti ugovor o međusobnim pravima i obavezama i utvrditi konkretne zadatke službi u pitanjima zaštite i spašavanja ljudi i materijalnih dobara od prirodnih i drugih nesreća, kao i način djelovanja službi kada Općinski štab donese naredbu o njihovom angažovanju na zadacima zaštite i spašavanja na području Općine.

Zaključivanje ugovora iz stava 1. ovog člana vrši se onda kada Služba za civilnu i protivpožarnu zaštitu utvrdi da je pravno lice ispunilo uslove iz člana 14. ove Uredbe, a pravno lice koje ne ispuni te uslove nema status službe zaštite i spašavanja.

## Član 19. (upotreba službi)

Upotrebu Službi zaštite i spašavanja iz člana 6. ove Uredbe na zadacima zaštite i spašavanja, te vrijeme i mjesto za njihovo djelovanje na području općine, naređuje Općinski štab civilne zaštite, samoinicijativno ili na prijedlog Službe CZ.

Kada Štab iz stava 1. ovog člana naredi angažiranje službi zaštite i spašavanja, rukovodioci pravnih lica iz člana 6. ove Uredbe, odnosno pomoćnik općinskog načelnika za civilnu i protivpožarnu zaštitu u kojima su formirane službe zaštite i spašavanja, dužne su preduzeti sve potrebne mjere kojima će osigurati da službe pravovremeno dođu na mjesto određeno naredbom Štaba i da mogu vršiti zadatke iz svoje nadležnosti.

Izuzetno, u hitnim slučajevima, kada ne postoji mogućnost da se u što kraćem roku održi sjednica Općinskog štaba, angažiranje Službi zaštite i spašavanja iz člana 6. ove Uredbe može da naredi komandant, odnosno načelnik Općinskog štaba, ako je komandant odsutan, o čemu je dužan blagovremeno obavijestiti komandanta tog štaba.

Službe zaštite i spašavanja iz člana 6. ove Uredbe angažiraju se onda kada Općinski načelnik proglasi nastanak prirodne ili druge nesreće na području općine, a izuzetno, angažiranje tih službi može se izvršiti i prije proglašenja prirodne ili druge nesreće u slučaju kada prijete neposredna opasnost od nastanka te opasnosti ili nesreće ili ublažavanja njihovog djelovanja.

## Član 20. (evidencija)

Evidenciju o popuni, opremanju i obuci službi zaštite i spašavanja vodi Služba civilne zaštite općine.

Služba za civilnu i protivpožarnu zaštitu poduzimat će odgovarajuće aktivnosti na formiranju službi zaštite i spašavanja iz člana 6. do 12. ove Uredbe, obučavanju i stručnom osposobljavanju i u tim pitanjima pružati odgovarajuću stručnu i drugu pomoć i starati se da službe budu osposobljene za vršenje zadataka za koje su formirane, a pravna lica iz člana 6. ove Uredbe dužna su postupiti po zahtjevima Službe za civilnu i protivpožarnu zaštitu.

#### **IV – PRIJELAZNE I ZAVRŠNE ODREDBE**

##### **Član 21. (prijelazna odredba)**

Službe zaštite i spašavanja iz člana 6. do 12. ove Uredbe formirat će se u roku od tri mjeseca od dana stupanja na snagu ove Uredbe.

Općinska služba za civilnu i protivpožarnu zaštitu dužna je pružiti svu odgovarajuću stručnu pomoć pravnim licima iz člana 6. ove Uredbe na pravilnom i blagovremenom formiranju Službi zaštite i spašavanja tih pravnih lica.

##### **Član 22. (završna odredba)**

Ova Uredba stupa na snagu narednog dana od dana objavljivanja u "Službenom glasniku Općine Cazin".

Broj: 01/N – 44 - 7463 /08  
Cazin, 06. 05. 2008. godine

OPĆINSKI NAČELNIK  

---

Nermin Ogršević, dipl ecc